

3 Jon

Nalobulat napolisulan na-vəha-tor-an aJon totoni

Ase itos nalobulat egai?

AJon tovi ahai susur siYesu, gai itosi.

AJon itos nalobulat egai hən nəsa?

Itosi hən beʋusan alat siYesu hən naʋide hən ləbith, ʋon mai aGot mai nəvanuan tile gail.

AJon itos nalobulat van hən ase?

Itosi van hən aKaius mai alat lotokad nadəlomian len aYesu Kristo len naut ʋisi.

AJon itos nalobulat ʋais?

Hum ma totoni len nasihau A.D. 90.

1) Na-ke-ivoi-an van hən aKaius (1-4)

2) Sagigol tətəʋ hən naʋide tosa seTiotrefes, be gigol naʋide tivoi, gevi tarhət sihai ʋusan gail lotogəmgəm ei len nəyaran salito (5-12)

3) Nə-maris-kotovi-an (13-15)

Na-ke-ivoi-an

¹Ginau, nəvanuan na-il-a-mō-an, nutos nalobulat egai van hən gaiug, aKaius, notoləmas bun gaiug len nakitinan.^a

²Gaiug, notoləmas bun gaiug, nous aGot ke tilav nədaŋan mai gaiug hən natit ʋisi len nəmauran saṃ ʋivoi ʋai ale hən gəʋimaur, hum notoləboi tia ke nəloṃ tomaianan. ³Nokəmaianan husur nəboŋ nəbathudud nadəlomian galevis lototəlmam, lugol ginau nukemkem masuʋ nəboŋ lotokel kot nəloṃ todaŋ len aGot, mai naʋide saṃ tohusur nakitinan ʋai.

⁴Anatugw, nəboŋ notosəsəloŋ ke anatugw gail len nadəlomian lotohusur nakitinan, igol ginau nukemkem səhor natit ʋisi am.

Igol aKaius eləŋon ivoi am len nəlon

⁵Gaiug, notoləmas bun gaiug, len nadəlomian saṃ goil gəgat nəboŋ gotoum vi tarhət sinəbathudud nadəlomian gail, naut kəmas lotovi metʋos. ⁶Len nəhon alat siYesu, galit lukel kot na-ləmas-buni-an saṃ vi

^a 1.1 Uman 19.29; Rom 16.23; 1Kor 1.14

təban galito. Gevi tarhət salit len nəyaran salito len nəvīde tonor hən nəsa aGot toləŋoni. ⁷Husur len natubatan hən nəyaran salit mōs nahəsan Nasub, ləsəlav natideh sinəvanuan ləsəkad nadəlomian. ⁸Imaienan, gidat māu datevi tarhət sinəvanuan nəyaran lotomaienan hən datbeum bōnbōn mai galito mōs nakitinan.

ATiotrefes mai aTemetrius

⁹Ginau nutos natuhlobulat van hən alat siYesu tia hən ləbēvi tarhət sinəvanuan nəyaran galenan, be aTiotrefes, toləŋon bun hən bēil a mō, gai emətahun ginamito. ¹⁰Imaienan, nəboŋ nəbēgəmai, dereh nikel urur nəsa gai togolgole: len nasoruan sasa elibliboŋ, kel nəmadunamito. Be səvi natenan ŋai, gai emətahun nəbathudud nadəlomian gail lotoyar ləbītoh maii. Ale natsual am. Ikai tas nəvanuan gail lotohəhəvur hən alat lotoyar ləbītoh mai galito, ale ehut galit dan alat siYesu.

¹¹Gaiug, notoləmas bun gaiug, sagigol tətōv hən nəsa tosa, be gol tətōv hən nəsa tovoi. Gai togol nəsa tovoi, evi siGot; gai togol nəsa tosa, etətan hən aGot. ¹²Ivoi hən mətbevi tarhət siTemetrius. Nəvanuan pisi lukel kot navoian san. Navoian len nəmauran san eṽusan nakitinan. Ginamit am namtukel kot navoian san, ale mətoləboii ke namtokitin ŋai.

Nə-maris-kotovi-an

¹³Nukad natit isoḅur hən nəbītoŋi van hən gamito, be nomətahun nəbītoŋi hən napen len nalobulat. ¹⁴Nuvatvat viri ke asike idareh neris gamito, ale dereh gidat datihol gabag.

¹⁵Nəlomit tikad natəmat. Nabubur sidat gail lukel na-ke-ivoi-an van hən gamito. Kel na-ke-ivoi-an mai nabubur sinamit gail pisi ei.